

27 JUN, 2021

# BEKALAN TERHAD, PERMINTAAN TINGGI

Metro Ahad, Malaysia

Page 1 of 3

**AGRO**

Oleh Nurul Husna Mahmud  
 nurul\_husna@hmetro.com.my

Antara isu menarik perhatian ramai hari ini ialah harga raja buah yang tidak munasabah apatah lagi ketika masyarakat berdepan Sekatan Pergerakan Penuh.

Penawaran harga durian dilihat terlalu tinggi hingga membebankan pengemernya.

Rata-rata tidak dapat menerima kadar harga jualan terutama durian kampung mencecah sehingga RM25 sekilogram berbanding sama boleh didapati dalam selongkok satu ketika dulu.

Dalam menyelami isu ini, pelbagai lapisan penggiat daripada peringkat tanaman sehinggalah ke jualan didekati bagi memahami alasan di sebalik kenaikan harga buah tempatan berkenaan.

Peniaga durian di Pasar Tani Kekal (PTK) Datin Halimah, Johor Bharu, Samsul Kamar Sanawi Kamaruddin berkata, harga jualan durian ini



Contohnya dua minggu lalu, harga melonjak bagi semua jenis durian kerana kebiasaan pada awal musim, buah yang luruh tidak serentak di semua tempat

**SAMSUL**



PROSES pengredan durian mengikut saiz dan kualiti dilakukan sebelum dipasarkan.

FOTO MOHD YUSNI ARIFIN, MOHD ZABIDI AHMAD & SAMSUL KAMAR



HARGA naik turun disebabkan permintaan tinggi durian.

# BEKALAN TERHAD, PERMINTAAN TINGGI

Harga raja buah dijangka menurun bermula minggu depan iaitu awal Julai kerana berada pada kemuncak musim



ANTARA kaedah unik hasil inisiatif pengusaha seperti Mohd Zabidi memastikan buah dikeluarkan dari ladangnya menepati gred terbaik.

tidak menentu bergantung kepada hasil sama ada banyak atau sebaliknya pada satu-satu musim.

"Fenomena harga terlalu tinggi berpunca daripada bekalan buah yang sangat terhad berbanding permintaan tinggi di pasaran.

"Contohnya dua minggu lalu, harga melonjak bagi semua jenis durian kerana kebiasaan pada awal musim, buah yang luruh tidak serentak di semua tempat.

"Itu antara punca harga boleh jadi tidak masuk akal sehinggalah mencecah RM25 sekilogram bagi durian kampung.

"Lagi satu ialah sikap segelintir peniaga buah itu sendiri yang cuba main harga kerana lihat masih ada yang sanggup membeli

meskipun kadar itu jauh lebih tinggi daripada biasa," katanya.

Kata Samsul Kamar, orang ramai tidak perlu bimbang kerana dijangka harga buah itu menurun bermula minggu depan iaitu awal Julai kerana berada pada kemuncak musim.

"Saya jangka bermula awal Julai, orang boleh nikmati kadar harga 'pengsan' untuk durian kerana ia luruh atau bekalan boleh didapati di semua tempat atau negeri.

"Keadaan ini mewujudkan pasaran seimbang kerana hasil banyak sehingga penjual terpaksa menurunkan harga bagi membolehkan buah itu terjual. Stok jualan untuk durian perlu dihabiskan setiap hari kerana mutu sudah terjejas

keesokan harinya.

"Saya sendiri sudah mula turunkan harga iaitu RM15 sehinggalah RM8 sekilogram bagi durian kampung sementara durian kahwin paling mahal pun dalam sekitar RM25 sekilogram.

Dijangka akan ada kemungkinan dijual dalam harga mengikut biji jika buah terlalu banyak pada minggu berikutnya.

"Bekalan atau stok durian yang dijual di pasar ini setiap hari diperoleh daripada pekebun durian atau hasil kebun yang dipajak sudah cecah 500 kilogram hingga ke 600 kilogram. Berbanding awal musim dahulu hanya sekitar 200 kilogram sehari," katanya yang turut memiliki kedai tetap di Pekan Nanas, Johor Bahru.

Sementara itu, pekebun durian kahwin dari Tanah Merah, Kelantan, Mohd Zabidi Ahmad, 39, berkata, harga durian juga boleh dipengaruhi kos logistik dan pengurusan ladang yang kian meningkat setiap tahun.

"Berdasarkan pengalaman saya dalam tempoh mengusahakan kebun durian untuk jualan hasil dalam tempoh dua tahun ini, memang menelan belanja yang tinggi.

"Sebenarnya penjagaan pokok durian ini cukup remeh dan bermula awal tahun. Ini meliputi penjagaan kesuburan tanah memerlukan baja khas membantu mengatasi ancaman anai-anak merah pada pokok durian matang.

27 JUN, 2021

# BEKALAN TERHAD, PERMINTAAN TINGGI

Metro Ahad, Malaysia

**DARI MUKA 35**

"Kos kasar untuk saya uruskan 120 pokok dalam ladang berkeluasan 1.62 hektar dalam anggaran RM17,000 hingga RM25,000 bagi hasil RM40,000 semusim atau setahun.

"Baja untuk durian ini pelbagai kategori, kena ada baja untuk elak tanah jadi masam, baja batang dan daun.

"Apabila pokok mula mengeluarkan bunga kena beri nutrien atau baja kalsium sebagai makanan dan keluarkan kualiti buah yang baik," katanya.

Katanya, bagi mengatasi masalah ancaman perosak dan penyakit pula, dia tidak gunakan bahan kimia (anggaran RM90 sebotol untuk keluasan kebun sekitar sehingga 1.6 hektar) sebaliknya memilih kaedah organik yang kos bahan berupa sejenis kulat mencecah RM60 sekilogram bagi tanah berkeluasan 0.4 hektar. Jadi, untuk rawatan perosak, dia menanggung kos dua hingga tiga kali ganda berbanding kaedah biasa.

Itu belum dikira kos lain seperti upah pekerja untuk membersihkan kebun yang juga sudah meningkat, jika tiga tahun lalu RM100 hingga RM200 untuk 0.41 hektar kini sudah mencecah RM300.

Hasil buah juga tidak menentu kerana terdapat ancaman haiwan perosak seperti monyet, babi hutan dan tupai menyebabkan



ISI durian kahwin kuning diuji Mohd Zabidi.

hasil atau buah dikeluarkan turut terjejas.

"Lagi berisiko bagi mereka yang baru menanam pokok usia tujuh atau lapan bulan yang tiada jaminan selepas lima tahun penjagaan terus dapat hasil baik.

"Mereka perlu menyerap kos penjagaan lima tahun sebelum menikmati hasilnya, ancaman haiwan perosak terutama babi hutan dan monyet yang gemar sabotaj pokok yang baru hidup juga risiko perlu ditanggung pekebun.

"Saya perhatikan anak pokok 'batch' terbaharu lebih sensitif termasuk pokok premium yang memerlukan penjagaan lebih teliti. Pada saya harga durian bermutu di pasaran adalah wajar dengan kos

perlu dilabur pekebun dalam penjagaan pokok dan kebun," katanya.

Sementara itu, Lembaga Pemasaran Pertanian Persekutuan (Fama) menerusi Timbalan Ketua Pengarah Operasi, Mohamad Mustahapa Awang berkata, pihaknya sentiasa memainkan peranan aktif dalam menstabilkan harga jualan buah tempatan terutama durian.

Namun, naik dan turun harga jualan durian masih dalam kawalan permintaan serta penawaran.

"Berdasarkan tinjauan harga durian di peringkat ladang, sehingga bulan ini harga gred durian premium sekitar 22 hingga 40 sekilogram.

Pada saya harga itu masih munasabah berdasarkan kos pengurusan ladang dan kerja keras petani bagi menjaga kebun sehingga hasil boleh dinikmati pengguna.

Aktiviti penggredan, pembungkusan dan pelabelan buah turut dilihat membantu petani mendapat harga sepadan dengan kualiti buah.

"Gred bermula Premium, gred 1 dan 2. Kalau di pasaran pula sistem gred premium itu adalah bersamaan dengan gred AA, A dan B.

"Peringkat harga runcit buah durian bermula RM34 hingga RM60 sekilogram mengikut varieti klon, gred dan kualiti buah. Namun tidak dinafikan ada penjual sanggup ambil risiko dengan meletakkan harga

# SERAP KOS PENJAGAAN 5 TAHUN

Harga durian bermutu tinggi di pasaran wajar apabila diambil kira kos dilabur setiap pekebun



PEKEBUN durian membelanjakan sejumlah besar wang bagi penjagaan kebun sehinggalah kepada ancaman haiwan perosak.


sehingga RM70 hingga RM80 sekilogram dengan penawaran yang lebih eksklusif," katanya.

Saranan pihaknya kepada peminat durian adalah membuat pilihan bijak dalam pembelian buah yang berkualiti.


"Perlu faham buah durian kampung isinya sekitar 10 peratus dan yang lainnya adalah kulit dan biji. Berbanding buah premium atau durian kahwin, komposisi isi sekitar 25 hingga 30 peratus. Jadi realitinya pembelian buah premium termasuk durian kahwin ini lebih berbaloi meskipun tanggapan ramai orang ia mahal," katanya.

Orang ramai boleh juga mengikuti kempen jualan atau karnival durian Fama bagi mendapatkan durian berkualiti.

Malah orang ramai juga boleh mendapatkan maklumat daripada laman sesawang dan media sosial FAMA berkaitan harga, gred dan kualiti.



HARGA runcit lebih tinggi berbanding harga ladang kerana kos dalam rantalan sehingga tiba ke tempat jualan.



27 JUN, 2021

## BEKALAN TERHAD, PERMINTAAN TINGGI

Metro Ahad, Malaysia

Page 3 of 3

### SUMMARIES

#### AGRO

nurul\_husna@hmetro.com.my Antara isu menarik perhatian ramai hari ini ialah harga raja buah yang tidak munasabah apatah lagi ketika masyarakat berdepan Sekatan Pergerakan Penuh. Penawaran harga durian dilihat terlalu tinggi hingga membebankan penggemarnya. Rata-rata tidak dapat menerima kadar harga jualan terutama durian kampung mencecah sehingga RM25 sekilogram berbanding sama boleh didapati dalam selenggok satu ketika dulu.